

燕在閣知新錄

燕在閤知新錄卷十六

豐山王 棠勿翦氏彙訂

瀘州先 著遷甫

岑川程夢星泝江

江都程式莊高崢

新安江 瑞天玉 叅校

舞字

嘗聞孔廟祭丁時奏樂舞大哉孔子四字初謂事不經
以爲近於兒戲後讀唐人王建宮詞云羅衫葉葉繡重
重金鳳銀鵝各一叢每遍舞時分兩向太平萬歲字在

當中因知唐人舞樂舞出太平萬歲四字則知舞字之制其來已久不獨孔廟然也

舞金碗

唐張祜詩春風南內百花時道唱梁州急遍吹揭手便拈金碗舞上皇驚笑悖拏兒此悖拏兒唱急調手舞金碗將以進酒也在晉魏時飲酒亦有用杯盤起舞者晉書云晉世寧舞杯盤魏子建妾薄命云玉人起舞盃盤然則舞金碗卽舞盃盤舞杯盤之意

音樂

吳下能音樂者王侯家競相徵聘亦有由此得官者勢

焰赫赫卽清廉大吏亦莫可誰何此亦世風之弊也昔漢元帝子定陶共王能知音帝數稱其材史丹曰凡所謂材者敏而好學溫故知新若乃器人於絲竹鼓鼙之間則是陳應李微高于匡衡可相國也陳應李微當時知音者匡衡元帝相也棠謂今日之敏而好學溫故知新者皆糠粒不飽如陳應李微一輩罔不得時而駕此亦音樂極盛之會也安得史丹輩建論朝端使知論材在此不在彼則有裨世教關係不少也

季札不知樂

季札觀樂人皆謂能聽聲以察時政故知其興衰也子

謂不然夫文王化行南國故周南召南咸被其化何以
云猶未也邶鄘爲衛所滅故二國被康叔之化乃未幾
邶鄘皆爲楚所得札未知也至於齊誦美太公稱其國
未可量乃呂太公之地未幾而爲田太公所得札未知
也至於晉爲三家分其地札雖有幸於三族之語而聽
樂云何憂之遠也予謂不然使晉能憂遠國不敗矣至
於鄭謂其先王乃齊晉亡而鄭猶存亡者不亡矣魏爲
晉獻所滅札又曰以德輔此則明主也明者不明矣若
夫秦聲只稱其大而季札觀樂後秦日盛一日至秦始
皇凡三百四十年至于一統札未知也且各國之聲皆

有美哉二字或至矣哉思淡哉廣哉一句至秦獨無夫
三百年富強之國中原鮮有敵者豈美出鄭衛下乎此
又所不可解者歌王歌豳歌小雅歌頌札只論其大槩
不涉時政獨歌陳札曰國無主其能久乎後果爲楚所
滅余因前輩謂札觀樂預知興亡故著論於此孫明復
文王論
以猶有憾三字謂季札不知樂若文王猶
有憾則孔子何以謂之至德語有灼見

閔蔡審音

孔子晝息而鼓琴閔子自外聞之以告曾子曰嚮聞夫
子之音清微而和淪入至道今也更爲幽沉之聲幽則
欲心之所爲發也沉則貪德之所爲施也夫子何感若

斯乎於是同入問焉夫子曰然吾有之向見狸方取鼠
欲其得之故爲是音汝二人者孰識諸曾子對以閔子
夫子曰可以聽音矣後漢蔡邕在陳留隣人有以酒食
召邕者比往而酒已酣客彈琴於屏邕至門前聽之曰
以樂召我而有殺心何也遂返將命者人告主人自追
問其故莫不撫然彈琴者曰向見螳螂方向蟬蟬將去
而未飛螳螂爲之一前一却吾恐螳螂之失蟬也此豈
爲殺心而形於聲乎邕歎曰此足以當之嗚呼意存於
中而音形於外薛敬軒曰履霜而知堅冰之將至羸豕
而知躑躅之有孚故凡事必謹於微微不謹必至於著

匏

匏土二音

舊唐書云笙女媧氏造列管於匏上內簧其中今之笙以木代匏而漆之無匏音矣宋葉少蘊避暑錄云大樂舊無匏土二音笙以木刻其本而不用匏塤亦木爲之元史又云匏以竹爲之夫土鼓樂之始也陶匏祭之大也國語伶州鳩曰匏竹利制又匏以宣之瓦以贊之今之樂匏土棄而不用八音於是乎僅有六矣元熊朋來五經說曰八音之有笙宜以竹稱而乃以匏稱是所重在匏也古者造笙必以曲沃之匏汶陽之竹漢太學槐

市各持方物列磬懸匏八音之匏於卦爲艮於風爲融
於氣爲立春匏音啾以立清闕之則清廉者鮮矣匏音
正則人思敬不正則忠敬者鮮矣爲禮樂之官者尚申
請而改正之

琴

范仲淹問琴理於遵度答曰清麗而靜和潤而遠琴是
矣通雅曰敝泛琴聲也樂書曰絃合聲以作主暉分律
以配臣九歎有彈緯楊升庵謂緯卽徽徽卽暉也志林
曰嵇康琴賦云間遼故音輝絃長故微鳴所謂癰李俗
大敝聲敝音鮮見羯鼓錄兩絃之間遠則有敝故曰間

遠絃鳴云者今之所謂泛聲也絃虛而不按乃可按故曰絃長而微鳴也吳曾引晁無咎云浮雲柳絮爲泛聲輕非絲重非木也喧歌百鳥羣忽見孤鳳凰爲泛聲中二指聲也胡元瑞曰琴譜有疊蠲謂二指後先齊下也兼合諸說知古之所謂泛聲卽通雅所謂敔嵇康所謂痺是矣按痺勞也說文勞病也以痺形容琴聲淡得琴理而泛聲之說或以爲浮雲柳絮或以爲間遠絃鳴又以兩絃之間遠則有敔則此移聲遠引相連貫處皆謂之泛聲也喧歌百鳥鳴忽見孤鳳皇泛聲中寄指聲是獨響者爲鳳皇鳴浮雲柳絮者爲泛聲也今世謂虛指

者爲泛聲是皆不知放癰之義矣

月琴

武后時蜀人蒯朗於古墓中得銅器似琵琶而圓時人莫識之元行冲曰此阮咸所造命匠人以木爲之行冲以其形似月聲合琴名月琴杜祐以爲晉竹林七賢圖阮咸所彈與此同因謂之阮琴臞仙曰蓋咸一人之物也自南宋之後不復有聞矣今僅千載而無傳焉予因見竹林七賢圖繪因相其形出一已之制度而製之名曰臞仙月琴臞仙者嘉靖年間親王也

瑟

古人無故不去琴瑟韓非子外儲說齊宣王問匡倩曰
儒者鼓瑟乎曰不也瑟以小絃爲大聲以大絃爲小聲
是大小易序貴賤易位儒者以爲害義故不鼓也棠按
古人言琴必言瑟又何以稱焉漢郊祀志秦帝使素女
鼓五十絃瑟悲帝禁不已故破其瑟爲二十五絃又禮
圖舊云雅瑟二十五絃常用者十九絃頌瑟亦二十五
絃各一絃世琴瑟者甚多而操瑟者寥寥矣蓋不

五十絃

五十絃之說按漢書郊祀志有五十絃之文東坡云其
絃五十其柱如之要亦有所本按錦瑟七絃出周禮樂

器圖雅瑟二十五絃頌瑟二十五絃飾以寶玉曰寶瑟
繪文如錦曰錦瑟

鼓

鼓之爲道其應無窮小擊則聲小大擊則聲大不撞不
鳴鳴之理未嘗不具也管子云天地一險一易若鼓之
有停音張
撞也房司空注云險易猶否太言天地否太應德
而至如枹鼓然棠謂擊鼓小道耳管仲於中看出天地
可見古人往往於事物上觀理又攷三禮圖古人於鼓
之布置大小多少尺寸皆有不同夏后氏謂之鼓足鼓
有足也周人縣鼓而建鼓用朮朮貫之用殷法也縣之

所用也又有鼗鼓賓至搖之使奏樂也又有雷鼓貫八面懸之祀天神靈鼓貫六面懸之祭地祇路鼓四面享宗廟又鼗鼓軍旅用鼗鼓鼓役事晉鼓鼓金奏此上諸鼓或立木或架其大小尺寸布置總不同於今之所用也

鼓一通角一疊

鼓三百三十三槌爲一通角十二聲爲一疊

鼓吹

鼓吹軍中之樂也非軍功不用陳蔡徵爲吏部尚書啓後主借鼓吹後主謂有司曰鼓吹軍樂有功乃授王弼

州觚不觚錄言先朝之制惟總兵官列營始舉炮人鼓吹嘉靖後巡撫乃放而行之今則士庶人皆用矣

琵琶

推手向前曰琵琶却手向後曰琵琶一說自下而上曰琵琶自上而謂下曰琵琶漢烏孫公主嫁昆彌念其行道之遠思慕故國使知音者載琴瑟箏筑空侯之屬作馬上之樂名琵琶又蔡文姬十八拍云琵琶出自胡中緣琴翻出皆未言及明妃後人賦昭君如老杜千載琵琶作胡語皆以爲明妃事用之矣古用鷓鴣筋爲絃石爲槽鐵撥高麗以蛇皮爲槽槽木爲面象牙爲捍今之製同高麗

東坡詩轉關渡索動有神蔡寬夫詩話曰轉關六么言
聲調間婉也渡索謂音節繁促也其琵琶字作婆韻琵琶
作匹讀則見於白樂天小庭見月詩菱角執笙簧谷兒
挾琵琶音婆紅綃信手舞紫綃隨意歌又云忽聞水上琵琶聲琵琶音匹類說云呂與鍾離會武夷山謝英妃撫長
離呂阿香憂圓腹注長離畢策也圓腹琵琶也

樂府雜錄真元中敎坊康崑崙彈琵琶爲第一手而莊
嚴寺僧善本者下撥聲如雷其妙絕入神崑崙奏且誨
崑崙彈一調子聽之師曰本領何雜兼帶邪聲崑崙驚
曰段師神人也善本俗姓段臣小年初學琵琶於隣舍女奴

樂府金 卷之六
處授一品該調子後仍易數師段精鑒之妙如此段奏
曰遣崑崙不近樂器十餘年使忘其本領然後可教詔
許之後盡段之藝

琵琶亦作枇杷

樂器琵琶漢劉然釋枇杷本出於胡中馬上所鼓也推
手前曰枇引手却曰杷象其鼓時因以爲名也昔人謂
千文枇杷二字不可分開引此則可分矣然予謂枇杷
當有從手從木之分

笛

笛同簫周禮笙師註杜子春云簫乃今時所吹五孔竹

遂三禮圖橫設而有五孔後乃增爲六又增爲七舊字
彙分笛遂爲二誤也按簫竹管也陸氏曰長三尺詩左
手執簫是也似笛以和衆聲今十番先吹笛而後衆樂
隨之亦古人吹簫之意又簾以竹爲之長一尺四寸圍
三寸七孔一孔上出徑三分凡八孔橫吹之詩仲氏吹
簾是也古人笛與簫簾有分今則混而爲一矣

抵技

抵技手循笛孔也馬融長笛賦抵技抑隱行入諸變按
拏揆臧遞相乘邇俗本譌作篴笏當從手不當從竹

打十番

王大將軍敦在武帝前時其言伎藝事王自言知打鼓吹於是振袖而想揚槌奮擊音節諧捷神氣豪上旁若無人鼓吹是軍前所需有鼓亦有吹者如今之十番人執一器而曰打十番者亦以打鼓統之也故知打鼓吹卽打十番之由起

簫

簫編小竹管爲之管長短不齊象鳳之尾故曰鳳簫郭璞謂簫一名籟莊子人籟則比竹是也臨川王氏曰簫大者二十四管長一尺四寸小者十六管長一尺二寸今二十四管之簫與十六管之簫樂器中備者甚少獨

吹洞簫洞簫者簫之無底者也簫之名則是而簫之制則非矣又筳韶舜樂書作簫韶先儒謂卽簫管之簫

拍板

度曲有拍板通雅曰拍板今拍之始也本無譜唐明皇遣黃幡綽造譜乃於紙上畫兩耳以進上問之曰但有耳道無節奏也韓文曰樂句卽拍板也研北雜志曰趙氏獨子固未仕元醉歌樂府執紅牙以節曲牙卽板也

頭管

篳頭管是也一名邁又筳管一名臧篳以竹爲管以蘆爲首宋太宗時三大宴升座進酒庭中吹臧篳以衆樂

和之故教坊謂之頭管也以其首次故曰頭也今世十
番以笛先起然後衆樂隨之亦當日頭管之意也唐九
部夷樂有漆觱篥胡部安國樂有雙觱篥銀字觱篥又
馬融笛賦云裁以當適註適管也古人謂樂之管爲適

唆哪

近樂器中有鎖吶音納而正德時詞曲作唆哪蓋皆後起
之名故字體隨人所書也資治通紀論曰正德間劉瑾
雖伏誅而宦官之勢猶不已往來如織擾害人民呵列
武夫吹打號頭故楚人王西樓作一詞曲以譏之曰喇
叭唆哪曲兒小腔兒大眼兒他吹翻了這家吹壞了那

家蓋言百姓之家致於困窮皆此宦豎往來之故也

醖段

唐有傳奇宋有戲曲諱詞說金有院本雜劇其實一也
元朝院本雜劇始分而二之院本則五人又謂之五花
爨弄或曰宋徽宗見爨國人來朝衣裝褻履巾裹傳粉
墨舉動如此使優人效之以爲戲又有醖段亦院本之
意但差簡耳取其如火醖易明而易滅也其間副淨有
散說有道念有筋斗有科汎王棠曰今世有爨段二字
疑起於此

胡部

唐禮樂記曰自周陳以上雅鄭淆雜而無別隋文始分雅俗二部入俗樂二十八詞是也又有曲出於胡部此名胡部之始也筆談曰外國之聲前自別爲四夷樂唐玄宗之時始詔法曲與胡部合奏自此全失古法以先王之樂爲雅樂前世新聲爲清樂合胡部爲宴樂

胡部諸調

筆談曰宮商角爲正聲徵羽爲變聲加變徵則從變之聲已瀆矣隋鄭譯始調具之均展轉相生爲八十四調清濁混淆紛亂無統竝創爲新聲自後有犯聲側聲正煞寄煞偏字旁字從半字之法然則今胡部諸調皆源

於鄭譯

曲調餘聲

曲調餘聲按樂府有所思一首有妃呼豨三字是也而樂府內如伊那阿收中吾羊無奴等句皆是餘音後世紛紛不一而足也

六么

通雅曰丁度云么乃詞令名有六么詞正字通云六么本於骰子之小點又讀書通云舞曲有六么東坡詩連娟六么趁蹋踑杳眇三疊紫陽關琵琶曲有六么樂工進曲錄其要者後轉爲綠腰六么云

又東坡詩轉關六么動有神蔡寬未曰轉關六么句言琵琶聲調閒婉也

合生

合生卽院本雜劇也唐書武一平傳曰中宗宴殿上胡人襪子何懿唱合生而歌言淺穢平一上書曰比來妖伎胡人街童市子或言妃主情貌或列王公名賢歌詠舞蹈號曰合生始自王公稍及閭巷按此則知唐玄宗黎園之戲又本於此

都盧

漢時有都盧巴俞角觝之戲西域傳云巴俞二洲名都

盧乃戲伎之名體輕善緣高有跟挂腹旋之名按今歌舞有時腰着地旋轉如飛當卽腹旋之遺法也又梁羊侃妾孫荆玉能反腰貼地銜席上之珍今演劇扮歌舞皆能反腰貼地

歌

元人謂歌之節奏有停聲有待拍有偷吹有拽捧字真句篤依腔貼調又能抑揚頓挫頂疊梁換縈行牽結敦拖嗚咽推欵九轉搖欠漫透方爲絕技棠謂古之善唱者昔人推韓秦娥沈古之石存符想亦不能過是也

鮑老

魁檯本喪家樂漢時嘉會用之唐時窟儡子唐戲之首
舞也卽傀儡是也漢高困平城陳平秘計造木偶人用
機關舞於陣間樂家翻爲戲顏氏家訓曰古有禿人名
郭好恢諧戲謔今云傀儡郭郎有詩云鮑老當年笑郭
郎笑他舞袖大郎當若教鮑老當筵舞舞更郎當袖轉
長

雲韶班

演戲而以班名自宋雲韶班起考宋教坊外又有鈞容
直雲韶班二樂宋太祖平嶺表得劉氏閨官聰慧者八
十人使學於教坊初賜名簫韶部後改名雲韶班鈞容

直軍樂也在軍中善樂者初名引龍直以備行幸驍導
淳化中改爲鈞容直後世總稱爲班也

淨旦末丑

懷鉛錄云古梨園傳粉墨者謂之參軍亦謂之葩葩音
靜廣韻艷妝飾也今傳粉墨謂之淨蓋艷之訛也扮婦
人者謂之狹音旦又音達又與獺通南華經云獺徧狹
以爲妻東廣微云獺以獺爲婦蓋喻婦人意遂省作旦
也蒼鶻謂之末者末北方國名周禮四藝之樂有韞東
都賦云儵倏兜離罔不畢集蓋優人作外國裝束者也
一日末泥蓋倡家隱語如爆炭崖公之類省作末又云

宋泥色主張引戲分付副末色打諢又都城絕勝雜扮
或名雜旺又名鈕元子又名拔和乃雜劇之散段多是
借裝爲山東河北村人以資笑今之打和鼓撚梢子散
耍皆是也今之丑脚蓋鈕元子之省文古杭夢遊錄作
雜班扭元子拔和

雜劇三甲

白水潛夫武林舊事宋雜劇三甲內有戲頭有引頭有
次淨有副末有裝旦少不過五人多不過八人按今世
有生有外有丑宋時末則今日之生也

宋教坊

武林舊事云宋聖節祇應人有雜劇色十五人歌板色
一人拍板色三人簫色三人箏色六人琵琶色五人嵇
琴色三人笙色十四人鳳篋色三十二人笛色四十八
人方響色六人杖鼓色十人大鼓色四人舞旋色一人
又有弄傀儡六人雜手藝九人女厮撲十人築毬軍二
十四人百戲二十六人百禽鳴二人棠按色者色目也
卽今之名目也歌板鼓板與拍板有別簫用三人而笛
用四十八人重笛音之清也方響卽今之雲鑼鳳篋卽
今之頭管杖鼓小鼓不同於大鼓女厮撲扮女人相撲
當卽白打之類百禽鳴能爲百鳥音如今維揚郭猶阮

之類

乾淳教坊樂部

樂部有雜劇色歌板色拍板色琵琶色簫色嵇琴色箏色笙色鳳篋色笛色方響色杖鼓色大鼓色舞旋色等名而每色內除歌板色外又有衙前教坊前鈞容直和顧等人和顧之名不解其義然當時又有謂之扳和者當是和顧中之尤者也然總不離音樂者近是

唱情

杭州錢書玉善聲每一演劇同人無不移情蓋其行止動靜無非情無非曲有難以語言詮者樂天問楊瓊一

首云古人唱歌兼唱情今日唱歌惟唱聲欲說向君君
不會試將此語問楊瓊子謂楊生不得見今之會此意
者其惟書玉乎

唱楊花

今有唱楊花者其事見北史時有楊花者本名白華胡
太后幸之華懼禍遁去太后思之作楊白華歌使宮人
連臂踏歌之柳子厚有楊白花詩

吳越聲邪

音律今日以吳越爲勝而越稍遜於吳所謬者以上音
說白未免潔玉遭點耳白樂天云吳越聲邪無法用模

教偷入管絃中誠哉是言今可恨不但偷入管絃正明
演入詞曲此則鄭聲之尤者

西廂疑義

風欠酸丁

文魔秀士風欠酸丁欠有音要遂使人不知其義蕭淑
蘭劇云改不了强文撒醋饑寒臉斷不了詩云子曰酸
風欠棠謂欠作欠伸之欠亦可

葫蘆提

葫蘆提糊塗也

宋太祖惡陶穀草詔乃曰只是檢舊本
依樣畫葫蘆耳後人以爲葫蘆提本此

遂易前因

張生寄書有云夫人以恩成怨遂易前因查因字與姻通用逸雅姻因也南史王元規傳姻不失親古人所重豈敢輒婚非類此以因爲姻張生書以姻爲因

縫口

縫口撮合山縫合唇撮合山媒人渾名縫口縫合唇立想皆妙

迭窖

怒時節把書生來迭窖歡時節把侍妾來逼臨迭窖跌窖擲窖顛暗擲躓皆言其苦也

大小車

量着這大小車如何載得起大小非謂車之大小謂車之多少也藍采和劇出來的偌大小年紀北人鄉語盡然如邵康節云程明道兄弟大小聰明是也俗本不知改之可笑

顛不刺

顛不刺的見萬千不刺北人觀語顛卽顛倒猶言沒頭緒也不刺二字隨字可襯如舉案齊眉劇破不刺碗兒是也萬曆四年張江陵當國將太祖南京所藏寶玩取上京師中有顛不刺寶石一塊重七分老米色若照日只見石光所以爲寶也著西廂劇文以顛不刺爲美女

之名不知何據見金陵瑣事

打當

打當

去聲卽打點也

周方

周方周旋方便也

惹的心漾

惹的心漾心蕩也元詞花柳中使人心漾

既不沙

既不沙猶云若不然如勘頭巾劇既不沙怎無個收拾

慈悲黃梁夢劇既不沙可怎生蝶翅舞鸞隨

湯他一湯

湯去聲金線劇休想我指尖兒湯着你皮肉湯作蕩便
不是今俗亦有此語

四星

今夜淒涼有四星舊謂二分半爲一星四星十分也徐
天池云製秤之法末稍存四星隱語下稍也兩世姻緣
劇我比卓文君有了上稍沒有四星可証

金粉

西廂記看消了六朝金粉漸減了三楚精神看消諸本
妄改作香銷王伯良又改作消疎漸減諸本妄改作清

減徐天池又改作玉減皆不是王本改金粉爲臙粉謂金粉無出唐顧瓊詞金粉小屏猶未掩安得無出耶

鵲伶淥老

西廂鵲伶淥老不尋常北詞伶俐謂之鵲伶或作胡伶或作鵲鵲或作鵲伶淥老謂眼也亦作睺老亦作六老老是襖字如身爲軀老手爲爪老是也鵲伶二字不端指眼隨在可用如宋方壺詞鵲伶惜惺惺王和卿詞假聰明逞胡伶是也

男寵

柔曼之傾意非獨女色亦有男寵焉自晉太康之後男

寵大興甚於女色士大夫莫不尚之以至夫婦離絕多
生怨曠王義方彈李義甫疏云義甫善柔成性狡猾爲
心昔事馬周分桃見寵後交劉洎割袖承恩生其羽翼
遂階通達而沈約懺悔文云追尋少年血氣方壯習累
所纏事難排豁淇水上宮誠無云幾分桃斷袖亦足稱
多此實生死牢穽未易洗拔棠按今日之嗜男色者能
如休文之悔者少矣今日之爲男寵者不但多金且致
高位今昔皆然良可嘆

簡閱

周禮太宗伯以軍禮同邦國大田之禮簡衆也王昭禹

曰坐作進退不講則不知刺伐擒縱不習則不能春以教振旅夏以教芟舍秋以教治兵冬以教大閱此所謂簡其能也棠按禮有六禮軍禮其一也丘氏曰軍禮有五王安石謂以用其命爲主以合其志爲終竊以爲有大師之禮以用其衆有大均之禮以恤其終然無大田之禮以簡擇之則亦無以別其材力之強弱技藝之能否心志之離合而致之用焉故必有大田之禮以簡其能然後知其力而任之而以興大役合其志而一之而以建大封是知五禮皆不可無而大田之禮尤爲其切要者也

周禮大司馬中

音仲

春教振旅

謂振整其衆

司馬以旗致民平

列陳

平其列以爲陳

如戰之陳

音陣

辨鼓鐸錡鐃之用以教坐作

進退疾徐疏數之節遂以蒐田吳澂曰凡師出曰治兵

入曰振旅先王因四時之田以教民戰而春日振旅者

取兵入之義以收其衆而使之就農也以旗致民謂植

旗而期民於其下也鐸錡鐃皆似磬而大小異鐸其至

大者鐸以通鼓錡以節鼓鐃以止鼓丘濬曰守國之備

全在素有以教之因蒐狩而習之因祭而行獵用獸以

試術目熟旌旗耳熟號令坐以待作以起進而前退而

後疾而趨走徐而緩行分疏而散開急數而屢進聞鼓

而興聽金而止一旦用以田獵者而施於行陣用以殺
獸者而施之敵人必不倉皇失措也

中夏教茆舍

草止之也

如振旅之陳羣吏撰

數擇之也

車

兵徒步卒

讀書

述事爲書

契

合驗爲契

辨號名之用帥

謂將軍以下

以門名縣鄙

各以其名家以號名鄉以州名野以邑名百官各象其
事以辨軍之夜事其他皆如振旅遂以苗田如蒐之法
丘葵曰帥六軍之帥也門所居之門公邑間田謂之縣
小都謂之鄙大夫謂之家鄉謂六鄉野謂六遂茆舍之
教乃寨法專以辨軍之夜事蓋休兵偃師之時宿火而
寢月固無見銜枚而處耳固無聞也將以鼓鐸而聲之

則所聞必亂將以旗物而揮之則所見必昧於是專以
號名爲尚而號名又必外假也所以防姦細及間諜等
事丘濬曰所謂撰車徒讀書契如今之人按簿籍以點
名也觀其所謂辨軍之夜事可見古人教戰不徒教其
晝且教其夜不徒教其行兵而又教其止息此所以舉
無廢事而兵無敗陳也歟

中秋教治兵如振旅之陳辨旗物之用王載大常

日月爲常

諸侯載旂

交龍爲旂

軍吏載旗

熊虎爲旗

師都

謂孤卿之位

載壇

通帛爲壇

鄉遂載物

雜帛爲物

郊野載旐

龜蛇爲旐

百官載旗

鳥準爲旗

各書其

事與其號焉其他皆如振旅遂以獮田如蒐田之灋吳

徵曰禮春夏不興師秋乃出兵之時也陳旗物所以作

戰也辨其用者有所將者有所畫無所將者無所畫

中冬教大閱

大閱兵而習戰

前期

先大閱之期

羣吏

謂鄉師以下

戒衆庶

修戰灋虞人

山澤之虞

萊所田之野爲表

除去田草立表

田之日司

馬建旗於後表

第一表也

之中羣吏以旗物鼓鐸鐃各帥

其民而致

致之大司馬

質明

天正明

弊也

旗誅後至者

仆旗而後至者

誅乃陳

陳列

車徒

步兵如戰之陳皆坐

使坐聽誓

羣吏聽誓於

陳前斬牲以左右徇陳曰不用命者斬之中軍以鼙令

鼓鼓人皆三鼓司馬振鐸羣吏作旗

植所仆者

車徒皆作

起也

鼓行鳴鐸車徒皆行及表

第二表

乃止三鼓

掩其口鐸

羣吏弊旗

及其旗

車徒皆坐文三鼓振鐸作旗車徒皆作

鼓進鳴鐸車驟

聚足而進

徒趨及表

第三表

乃止坐作如初乃

鼓車馳

決圍而去

徒走

速也

及表

第四表

乃止鼓戒三闕

鼓以三為節

車三發徒三刺乃鼓退鳴鐸且卻及表

退至第一表

乃止坐

作如初遂以狩田吳澂曰仲冬農暇故教大閱以簡車

馬習戰陳尤詳於三時萊所田之野謂芟除田野以便

馳驅也表所以正行列者於百步而立一表三表則三

百步又五十步為一表則四表總三百五十步左右之

廣當容三軍其步數隨軍多少可矣建旗後表之中謂

第四表之中央也賁明弊旗謂期衆之至須早故明以

仆旗後至者誅皆坐以當聽誓也陳前謂南面鄉表也
中軍爲中軍將也令鼓者鼓以作士氣也鼓人師帥旅
帥也司馬謂兩司馬振鐸以作衆也及表乃止謂自後
表前至第二表也三鼓攬鐸攬者掩鐸之口而振之所
以止行息氣也又二鼓而車驟徒趨及表乃止謂自第
二表前至第三表也又三鼓車馳而徒走及表乃止謂
自第三表前至四表也鼓戒謂戒攻敵也每鼓一闕則
車一轉徒一刺至三而止象敵服矣鳴鐃且却謂軍退
則卒長鳴鐃以和衆鼓及表乃止謂自前表至後表而
止也棠按大閱之名獨歸之冬者以春爲務農非治兵

之時故師出曰治兵入曰振旅春教振旅不亂用其衆也夏以芟止爲義而教以夜戰之事秋以治兵而教以晝戰之事冬則農事已隙舉春夏秋三時之所教而竝舉焉故謂之大閱也春所辨在鼓鐸鐃鐃夏所辨者在號名秋所辨者在旗物三者缺一不可三時各習其一故冬大閱皆合而行之合則貫通不致錯亂此先王教閱之法不全於後世也

左傳隱公五年臧僖伯曰春蒐夏苗秋獮冬狩皆於農隙以講事也三年而治兵入而振旅歸而飲至以數軍實昭文章明貴賤辨等列順少長習威儀也杜預曰蒐

索擇取不孕者苗爲苗除害也彌殺也以殺爲名順秋
氣也狩圍守也冬物畢成獲則取之無所擇也四時講
武三年而大習出曰治兵謂始治其事入曰振旅謂禮
畢整容而還也歸而飲於廟以數車徒器械及所獲也
林堯叟曰昭文章昭著也君大夫士車服旌旗各有文
章明貴賤謂田獵之制貴者先殺所以明君大夫士庶
人之貴賤辨等列謂辨上下之等第行列坐作進退皆
是也順少長出則少者在前趨敵之義還則少者在後
殿師之義皆所謂順也棠按周禮與左氏可以互相發
明左氏言三年而治兵此杜預所謂三年大習也周禮

中秋教治兵本秋彌也而教者乃治兵之事當成周時
田獵之禮每年四舉不曰田實而曰軍實正所以習戰
也及說到昭文章順少長習威儀等項可知教習武事
關係不小非僅從禽爲樂而已

東漢制立秋之日自郊禮畢始揚威武斬牲於郊東門
以薦陵廟其儀乘輿御戎路白馬朱鬣躬執弩射牲牲
以鹿麋太宰令謁者各一人載獲車馳駟送陵廟還宮
遣使者齎束帛以賜武官武官肄兵習戰陳之儀斬牲
之禮名曰貊劉兵官皆肄孫吳兵法六十四陳名曰乘
之丘濬曰漢承秦制三時不講惟十月車駕幸長安水

南門會五營士爲八陳進退名曰乘之而東漢所肄者乃六十四陳蓋六十四陳卽八陳演之爲八八六十四也所謂驅劉卽武帝時太初二年令天下五日之媿也媿音劉劉殺也蓋欲習戰陳之法先斬牲以爲禮也

唐制仲冬之月講武於都外前期十有一日所司奏講武兵部承詔遂命將帥簡軍士除地爲塲四出立五表又別墀地於北廂南向爲車駕停觀之處前三日尚舍奉御設大次及御座於墀地建旗爲和門如方色都墀之中及四角皆建以五采牙旗旗鼓甲仗威儀悉備大將以下各有統帥大將被甲乘馬教戰隊之法凡教

爲陳少者在前長者在後其還則反之長者持弓矢短者持戈矛力者持旌旗勇者持鉦鼓刀楯在前行持稍者次之弓箭爲後行旗臥卽跪旗舉卽起聲鼓卽進鳴金卽止講武之日皇帝乘革輅至壇所兵部尚書介冑乘馬奉引入自都壇北和門至大次在位者皆再拜謁者引諸州使人鴻臚引蕃客立於大次四方觀者立於都壇騎士仗外四周然後講武吹大角三通中軍將各以鞞令鼓二軍俱擊鼓三鼓有司偃旗步士皆跪大將立於旗鼓之東西面諸軍將立於其南北面以聽大將誓左右三軍各長史二人振鐸分循以警衆諸果毅各

以誓詞告其所部遂聲鼓有司舉旗士衆皆起騎從皆
行及表擊鉦騎從乃止又擊三鼓有司偃旗士衆皆跪
又擊鼓有司舉旗士衆皆起騎驟徒趨反表乃止東軍
一鼓舉青旗爲直陳西軍亦鼓舉白旗爲方陳以應之
次南軍鼓鼓舉赤旗爲銳陳東軍亦鼓舉黑旗爲曲陳
以應之次東軍鼓而舉黃旗爲圓陳西軍亦鼓而舉青
旗爲直陳以應之次西軍鼓而舉白旗爲方陳東軍亦
鼓而舉赤旗爲銳陳以應之次東軍鼓而舉黑旗爲曲
陳西軍亦鼓而舉黃旗爲圓陳以應之凡軍先舉者爲
客後舉者爲主從五行相勝之法爲陳以應之每變陳

二軍各選刀楯士五十人挑戰第一第二挑戰迭爲勇怯之狀第三挑戰爲敵均之勢第四第五挑戰爲勝敗之形每將變陳先鼓而爲直陳然後變從餘陳之法五陳畢兩軍俱爲直陳又擊三鼓有司偃旗士衆皆跪又聲鼓舉旗士衆皆起騎馳徒走左右軍俱至中表相擬擊而還每退至一行表跪起如前遂復其初侍中跪奏請觀騎軍騎軍皆如步軍之法每軍各八騎挑戰五陳畢大擊鼓而前盤馬相擬擊而罷遂投旅侍中奏禮畢乃還棠按此五行陳也用五方之色而所謂方圓曲直銳李靖謂實因地形使然非必謂銳陳以曲陳應之圓

陳以直陳應之方陳以銳陳應之曲陳以圓陳應之也
然彼此相制亦不外是周禮夏官敎振旅司馬以旗致
平列陳如戰之陳中夏敎芟舍如振旅之陳中秋敎治
兵如振旅之陳蓋一歲四舉唐制天子惟仲冬一舉季
冬則府軍敎閱宋太祖太宗亦爲講校雖歷代相承不
廢而所謂一歲四舉三年治兵之說皆不能行竝因田
獵以講武事皆非古人順少長習威儀之意且所謂九
軍八陳六花之遺法亦無有能道之者蓋其演武無軍
實可數皆是虛文應事至於田獵不拘時日亦無古人
所謂春蒐夏苗秋獮冬狩之說有心國是者當亦於周

禮一留意焉

兵法言左右

兵法云進退有度左右有局此古今用兵之要無度無局便不能軍矣左傳桓公五年王以諸侯伐鄭鄭伯禦之曼伯爲左拒祭仲足爲右拒原繁高渠彌以中軍奉公爲魚麗之陳先偏後伍五承彌縫車戰五人爲伍杜預曰司馬法二十五乘爲偏此亦言左右也昭公二十一年公子城以晉師至救宋與華氏戰於赭丘鄭翩華氏願爲鵠其御願爲鵝此意亦言左右也范蠡曰凡陳之道益左以爲牡設右以爲牝此言左右也宣公十有

二年薦敖爲宰軍行右轅左追蓐前茅慮無中權後勁
百官象物而動軍政不戒而備是則前後左右竝中軍
也桓公八年楚子伐隋隋季梁曰楚人上左君必左無
與王遇且攻其右右無良焉必敗偏敗衆乃携矣是亦
言左右也宣公十二年邲之戰欒武子曰楚軍之戎分
爲二廣廣有一卒卒偏之兩註十五乘爲一廣此則車
戰分左右也司馬百人爲卒二十五人爲兩車十五乘
爲大偏今廣十五乘亦用舊偏法復以二十五人爲乘
副李靖曰楚子乘廣挾轅而戰皆周制也特用一百五
十人比周制差多耳一乘步卒七十二人甲士三人二

十五人爲一申凡三申共七十五人陳祥道曰險野人爲主易野車爲主則險野非不用車而主於人易野非不用人而主於車車之於戰動足以衝突止足以營衛將卒有所芘兵械衣裘有所齎詩曰君子所依小人所腓則車之爲利大矣司馬法二十五人爲兩百人爲卒卒兩皆人也偏則車也杜預注云有九乘爲小偏十五乘爲大偏尤大者二十五乘之偏周魚麗之偏二十五乘之偏楚二廣之偏十五乘之偏也成公七年楚巫臣侵於吳以兩之一卒適吳舍偏兩之一焉是九乘之偏也先偏後伍伍從其偏也卒偏之兩兩從其偏也先其

軍足以當敵後其人足以待變也古者戰車大約左右

皆如此昭公元年晉中行穆子敗無終及羣狄於大原

崇聚也卒也將戰魏舒曰彼徒我車所遇又阨以什增十人也

共車必克困諸扼又克請皆卒自我始乃毀車爲行五

乘爲三位爲五陳卽兩伍專參偏也以相離兩於前伍於後專

爲右角參爲左角偏爲前拒以誘之翟人笑之未陳而

薄之大敗之又兩甄陳名左傳將獵爲兩甄置左右司

馬註兩甄猶兩翼甄音堅李靖曰雖舍車而法在其中

一爲左角一爲右角一爲前拒分爲三隊此一乘法也

千萬乘皆然曹公新書云攻車七十五人前拒一隊左

右角二隊守車一隊炊子十人守裝五人廐養五人樵
汲五人此荀吳之舊法也漢魏之間軍制五車爲隊僕
射一人十車爲師率長一人凡車十乘將吏二人多做
此以今法參用之則跳盪騎兵也戰鋒隊步騎相半也
騎隊兼乘車而出也臣西討數千里此制未敢易蓋古
法信可重也按李靖六花戰而言不易古法可知古人
變化總不離前後左右也攷左拒右拒左北右牡左轅
右轅左廣右廣左角右角左騂右騂左翼右翼卽今之
左營右營皆是進退有度左右有局之遺意耳

陳法

通典黃帝制陳法

周禮夏官中春教振旅司馬以旗致平列陳如戰之陳
中夏教芟舍如振旅之陳中秋教治兵如振旅之陳中
冬教大閱如戰之陳

司馬穰苴八陳

諸葛亮八陳圖

李靖六花陳

李靖曰黃帝始立丘井之法因以制兵故井分四道八
家處之其形井字開方九馬五爲陳法四爲間地此所
謂數起於五也虛其中大將居之環其四面諸部連繞
此所謂終於八也及乎變化制敵紛紛紆圍亂而法

不亂渾渾沌沌形圓而勢不散所謂散而成八復而爲一也此李靖之論黃帝兵法也通典司馬穰苴曰五人爲伍十伍爲隊一軍凡二百五十隊餘奇爲握奇故一軍以三千七百五十人爲奇兵隊七十有五以爲中壘守地六千尺積尺得四里以中壘四面乘之一面得地三百步壘內有地三頃餘百八十步正門爲握奇大將軍居之六纛五麾金鼓府藏輜積皆中壘外餘八千七百五十人隊百七十五分爲八陳八陳各有千九十四人八陳各減一人以爲陳之部署舉一軍則千軍可知蘇軾曰司馬法曰五人爲伍五伍爲兩萬二千五百人

爲軍二百五十取三焉而爲奇其餘七以爲正四奇四正而八陳生焉夫以萬二千五百人而均之八陳之中宜其有奇而不齊者是以多爲之曲折以盡其數以極其變鉤聯蟠屈各有條理丘氏曰兵者有四正四奇皆合而爲一或離而爲八是曰八陳故以正合爲奇勝也大抵穰苴之法卽古司馬之法其隊伍營壘坐作進退之度皆有所本世謂之穰苴陳法陳法者所以訓齊士卒使其上下如一前後左右進退周旋如身之運臂臂之使指無不如意也此蘇氏丘氏之論穰苴兵法也杜牧曰數起於五而終於八夔州諸葛武侯以石縱橫八

行爲方陳奇正之出皆生於此奇亦爲正之正正亦爲奇之奇彼此相用循環無端也諸葛出斜谷以兵少但能用六數司馬懿四十萬步騎不敢決戰知其能也朱熹曰陳圖自古有之周官所謂如戰之陳蓋是此法握機文雖未必出於風后所作然由來須遠武侯立石於江邊乃是水之回洑處所以水不能漂蕩丘濬曰亮生致孟獲七縱七擒獲觀營陳嘆曰公天威也司馬懿行營壘嘆曰天下奇材晉桓玄見魚復平沙上壘石八爲行相去二丈凡六十四蘊謂爲常山蛇勢說者謂玄妄言嗚呼神兵非學到自古不留訣至人心已悟後世徒

妄說蘇氏之言有自哉此杜朱丘三人之論八陳也棠
謂諸葛八陳出斜谷兵少用六數亦本之司馬穰苴可
以八陳亦可爲六陳也唐太宗問李靖曰六花陳法出
何術乎靖對曰臣所本諸葛八陳法也大陳包小陳大
營包小營隅落鈎連曲折相對古制如此臣爲圖因之
故外畫之方內環之圖是成六花俗所號耳方生於正
圓生於奇方所以矩其步圖所以綴其旋是以步數定
於地行綴應乎天步定綴齊則變化不亂八陳爲六武
侯之舊法焉此李靖之六花陳也宋仁宗曰黃帝始置
八陳法敗蚩尤於涿鹿諸葛造八陳圖此卽九軍陳法

也後至韓擒虎淡明其法以授其甥李靖靖以時遭亂通知其法頗多故造六花陳以變九軍之法使世人不卽曉之大抵八陳卽九軍九軍者方陳也六花陳卽七軍七軍者圓陳也蓋陳以圓爲體方陳者內圓而外方圓陳則內外皆圓矣故以圓物驗之則方以八包一圓以六包一此九軍六花之陳大體也六軍者左右虞侯軍各一軍爲二虞侯軍左右軍各二軍爲四廂軍與中軍共爲七軍八陳者加前後二軍共爲九軍朕采古之法酌今之宜曰營曰陳本出乎一法而已止則曰營行則曰陳奇正言之則營爲止陳爲奇也此宋仁宗總

論黃帝諸葛與李靖之陳法也棠攷古人出師必立營
陳無營則止無以自守無陳則出無以應敵周禮大司
馬有四時之教今周之制不能詳悉兵家所傳雖有書
恐亦未必盡能得黃帝武侯李衛公之舊法然其立言
則亦有本也蔡元定言譬如十分雄壯之人與一四五
分力人爭打雄壯人只有力而四五分人却識相打法
對副雄壯之人更不費力故識得陳法討幾許便宜朱
子論古來許多陳法遇征戰亦未必用得又言握機文
未必風后所作蘇氏論八陳云神兵非學到自古不留
訣說者又謂李靖與太宗論六花等語乃宋阮逸假托

而作可知全恃舊兵法而胸中無主宰則徒爲紙上之浮言是所謂趙括徒能讀父書也張巡不用古兵法不過使兵識將意將識士情至於臨機用變又不可執一論耳

天地風雲龍虎鳥蛇

八者乃八陳之名李靖曰古人祕藏兵法故詭設八名爾八陳本一也分而爲八天地者本乎旗號風雲者本乎旛名龍虎鳥蛇本乎隊伍之別後誤傳詭設物象何止八而已乎五行陳本因五方色立名方圓曲直銳實因地形使然朱子曰八陳每軍皆有用處天衢地軸龍

飛虎翼蛇鳥風雲之數各爲一陳有專於戰鬪者有專於衝突者又有纏繞之者獨孤及曰黃帝受命之始順殺氣以作兵法文昌以命將握機制勝作爲陳圖夫八宮之位正則數不憊神不忒故八陳所以定位也衡抗於外軸布於內風雲附其四維所以備物也虎張翼以進蛇向敵而幡飛龍翔鳥上下其勢以致用也棠按龍虎鳥蛇卽古人左青龍右白虎前朱雀後玄武之意孔穎達謂此明軍行象天而作八陳法朱立青白四方宿名中立北斗以斗末能指十二月軍行之旌旗法之象天之怒也則八陳之風雲天地龍虎鳥蛇其亦法天之

意也歟

戰車

鴻濛之世渾厚敦龐至蚩尤強暴黃帝與之戰於涿鹿之野始開後世戰鬪之端其時用戰車與否不可得而詳也書序武王戎車三百兩虎賁三百人蔡沈謂有戎車必有革車戎車卽馳車所謂戰車也革車卽輜車所謂藏器械財貨衣裝之車二車謂之兩陳櫟謂一虎賁必長百人一乘車總用百人以戎車合虎賁共三萬人也詩六月宣王北伐元戎十乘以先啓行秦風小戎倭也收軫元戎乃兵車之大者車綬輪馬披甲衡軛之上

皆有劍戟所謂陷軍之車朱子以爲車之前鋒小戎亦

戰車較元戎差小車之制廣皆六尺六寸平地任載則

軫深八尺小戎則軫深四尺四寸故曰小戎後收也考

工記車有六等之數車軫輿後橫大四尺謂之一等戈秘柄也

六尺有六寸既建而迤著戈于車斜倚也崇高也于軫四尺謂之

二等入長八尺崇于戈四尺謂之三等父長尋八尺曰尋有

四尺崇于入四尺謂之四等戟常倍尋曰常崇于父四尺謂

之五等舊近也矛常有四尺崇于戟四尺謂之六等之數

棠按父戟矛皆插車之旁六等總算一車之高下也車

軫四尺戈之秘有六尺六寸宜高于車軾六尺六寸

乃曰建而迤則高于軫四尺矣人長八尺則高于戈四尺矣爰長一丈二尺又高于人四尺矣戟一丈六尺又高於爰四尺矣此戰車五兵之制也遠則弓矢射之近則矛句之句矣然後爰擊之戈戟刺之司馬法曰弓矢圍爰矛守戈戟助以長衛短以短救長今車制不言弓矢弓矢乃乘車之人所佩也又按古者車戰之法每車甲士三人步卒七十二人二十四人居前二十四人居左二十四人居右居前者戰左右者挾轅常相更番後二十五人爲一隊去車二十五步所謂炊家子守衣裝廁養樵汲者行則以車爲衛居則以車爲營一車之外

又有副車以備不測棠攷考工記與司馬法有以車中

戰者有以車外戰者車之制度雖同而用時有不同者

故周禮中車所掌建太白殷之旗名以卽戎車僕所掌乃五

戎之副是以有戎車之萃猶副也廣車之萃闕車布闕之車之

萃萃萃猶屏也隱蔽之車也車之萃輕車馳敵致師之車之萃所謂萃者

有一戰車又有一副車以備不虞也戎車乃元戎廣車

乃橫乘之車楚人二廣本此萃車兵在車中而戰者輕

車則輕捷爭先者此棠所謂車雖一而用有不同也

馬端臨曰兵雖曰凶器然古之以車戰其坐作進退整

暇有法未嘗掩人之不備而以奇取勝也至戎狄之侵

中國雲合鳥散輕進易退於是乎車之雍容不足以當其徒之慄疾遂至舍車而用徒故必設覆以誘之未陳而薄之然後可以取勝而車戰之法廢矣秦漢以後之用兵其戰勝攻取大槩皆如鄭之禦戎晉之敗敵何嘗有堂堂正正之舉乎棠攷古者車制每一乘用四馬駕人每車用甲士三人步卒七十五人二十五爲一甲凡三甲用七十五人左持弓右持矛中執綏此利於守而不利於戰當列國之時車戰已非古制至秦漢之時則不復用雖衛青有武剛車晉馬隆有偏箱車亦不過爲載物之具而已堂堂正正四字實不能言掩人不脩以

奇取勝便爲兵家要訣蓋罷候置守之後天下一家車戰二字不但不能言亦不必言矣宋真宗時吳淑上疏請復古車戰之法謂夫人平居猶必謹藩籬固關鍵以脩不虞何況當虜之戰陳禦突騎之輕慄而無蔽護哉夫人之被甲所以蔽護其身也而戰之用車亦一乘之甲鎧也夫鱗介之蟲肌肉在內鱗介在外所以自蔽豈可使肌肉居外而鱗介反在內乎夫用車以戰亦一乘之鱗介也故可以行止爲營陳賊至則歛兵附車以拒之賊退則出兵擊之不懼胡騎之陵突也至和中有郭固車戰法嘉裕中有章詢陳脚兵車治平中有費懷信

萬全車李綱又上車制圖王大智造霆電擊車然皆不見用李綱所言其法用統制官張行中所創言步不足以勝騎騎不足以勝車請以車制頒京東西路製造而教習之兩竿雙輪上載弓弩又設皮籬以捍矢石下設鐵裙以衛人足長兵禦人短兵禦馬傍施鐵索行則步以爲陳止則聯以爲營每車用卒二十有五入四人推竿以運車一人登車以發矢餘執軍器夾車之兩傍每軍二千五百人以五之一爲輜重及衛兵餘當車八十乘卽布方陳則四面各二十乘而輜重處其中諸將皆以爲可用按李綱之策平原曠野可用邊塞之間則有

不宜又魏勝創爲如意戰車上爲獸面木牌大槍數十垂氈幕軟牌每車用二人推轂可蔽五十人行則載輜重器甲止則爲營掛搭如城壘人馬不能近遇敵又可禦箭鏃列陳則如意車在外以旗蔽障弩車當陳門其上置床子弩矢大如斲一矢能射數人發三矢可數百步礮車在陳中施火石礮亦二百步兩陳相近則陳間發弓弩箭礮近陳門則刀斧槍手突出交陳則出騎兵兩嚮掩擊拔陳追襲少却入陳間稍憇進退俱利伺便出擊慮有拒遏預爲解脫計按此皆以意爲之非復古戰車之制然苟宜於戰陳司馬亦宜採擇焉

燕在閣知新錄

卷十六終

孫

燕在閣知新錄卷十六終 姪孫輝祖 孫 燦正字